



## **ILS BANDITS – MATERIAL ACCOMPAGNANT**

Il dus mastergnants Gion e Peider scuvran, durant reparar ina lingia d'aua en ina chombra d'hotel, il tresor da la stanza. Il tresor è avert. Casualitad? – Tgi sa? – Ils dus mastergnants, uschiglio lavurers onests, stattan tuttenina davant in grond stgazi d'aur. La tentaziun è gronda, la ritgezza andetga carmala. Immediat sa fan giavischs e siemis zuppads valair ed embarassan fermamain ils dus lavurants. Pon els resister a la fortuna uschè manaivla?

Cura ch'els audan tuttenina pass en il corridor va tut fitg svel: in maun tanscha en il tresor ed il cuntegn da quel svanescha en in satg da plastic...

Sin la fugia da la polizia arrivan ils dus laders la finala en ina stanza da scola.

## **Ideas ed impuls per la magistraglia**

Cuntegn

1. DISCURS
2. GIEUS
3. SUPPLEMENT: Rap da Peider

# DISCURS

## Propostas per la magistraglia

### Chapientscha

- Tge è restà a tai da l'istorgia?
- Tge raquintas ti sco pli emprim a tes bab e tia mamma cura che ti es a chasa?
- Pos ti resumar curtamain l'istorgia e dir da tge che l'istorgia tracta?

### Gion e Peider

- Descriva las duas figuras Gion e Peider?
- Tgenina da quellas duas has ti survegnì pli gugent?
- Tge plascha a tai vi da Gion? Tge vi da Peider?
- Tge na plascha betg?
- Tge è la differenza tranter Gion e Peider?
- Es ti plitost sco Gion u plitost sco Peider? Tge pensan tes amis?
- Tge siemis han Gion e Peider?

### Enguladitsch

- La bischutaria han Peider e Gion laschè enavos en vossa stanza da scola. Tge faschais vus cun quai?
- Tge pensas ti da Gion che ha svidà ora la bischutaria sin il pult?
- Avessas era ti confessà sin questa moda?
- Tge crais ti? Tgi ha propi engulà la bischutaria? Gion? Peider? U omadus? U è quai stà tut simplamain disfortuna?
- Peider di che prender n'è betg uschè nausch sco engular? Tge pensas ti?
- Has ti era gia prendì u engulà ina giada insatge? Co è quai?
- Tge manegias ti da l'enguladitsch?
- Tge pensas, pertge han Peider e Gion insumma engulà? Giustifitgescha quai l'enguladitsch?
  
- Engulassas ti per tes meglier ami?
- Tge manegias ti da la fin da l'istorgia?
- Tge è capità vinavant cun Gion e Peider?
- Proposta:     Scriva ina istorgia?  
                  Gioga ina scena cun tes ami u tia amia?  
                  Fa in dissegn?  
                  ...

## **GIEUS**

### **RUDÈ – Splatschar**

*Reglas da gieu:* Tuts stattan en in rudè. Il/La mainagieu cumenza cun sa drizzar vers il vischin/la vischina a dretg u a sanestra, guarda ad el en ils eglis, e splatscha spertamain in giada. Quel sa drizza vers ses vischin e splatscha era. Uschia fa il splatsch la runda, il pli spert pussaivel. In splatsch enavos mida la direcziun. Singulas personas pon sa sbassar e lura vai vinavant tar il proxim. Il/La mainagieu duai auzar il tempo e trenar sin in ritem regular dals splatschs.

### **RUDÈ – Wusch-Boing-Peng**

*Reglas da gieu:* Enstagl da splatschar va in “wusch” enturn en la runda. La direcziun vegn manada cun in “boing”, quai è il scut u in spievel. A travers la gruppa sajettain nus in “peng”.

### **RUDÈ – Gea e na**

*Reglas da gieu:* Il medem princip sco tar il splatschar da basa. Enstagl da splatschar vegn dà vinavant “gea” e “na”. Il “clou” da la chaussa è che sin la vart dretg enturn vegn adina clamà “gea” e sin la vart sanestra adina “na”.

*Tips:* Tar ils gieus en il rudè èsi fitg impurtant che tuts stettian fitg bain sidretg sin omaduas chommas, ils mauns pendan neutralmain sper il corp, levamain star en la schanuglia per adina esser pront e savair reagir fitg svel. Impurtant èsi da prender si contact cun l’egliada, da dir cler e dad aut “hei” u “gea” euv.

### **La bumba ni il tartuffel chaud**

*Reglas da gieu:* Tuts curran enturn en il spazi. Il mainagieu bitta en ina balla. La balla fa la runda da persuna tiers persuna. Tuts bittan ella vinavant. Croda la balla per terra, explodescha la bumba e tuts crodan per terra cun in ferm “Aaah!”.

*Tips:* Ils giugaders ston bittar vinavant fitg svel la balla. Ins po era mintgamai clamar il num da quella persuna che duai pigliar la balla. Il mainagieu po bittar pliras differentas ballas en la runda. Ni era variar cun chalzers, cudeschs, buttiglias euv.

### **RUDÈ – Emoziuns**

*Reglas da gieu:* Tuts stattan en rudè. Il mainagieu gioga avant ina emoziun. Tuts imiteschan questa. Il proxim giugader fa avant in’altra emoziun. Tuts imiteschan puspè euv.

*Tips:* Impurtant è da duvrrar l’entir corp. Pia era ils pes, las chommas, il dies, il venter e sa chapescha la mimica.

### **Fraid e chaud**

*Reglas da gieu:* En dus. In zuppa ina chaussa insanua en stanza u era en chasa da scola u en il gaud. L’auter sto chattar questa. Il zuppader po gidar il tschertgader cun diriger cun “fraid”, “fradaglia”, “tievi”, “pli chaud”, “chalira”. Pli chaud ch’igl è e pli datiers ch’il tschertgader è da l’object zuppà.

*Tips:* Il tschertgader sto tschertgar cun eglis serrads.

U enstagl da “fraid” e “chaud” pon ils giugaders inventar plets secrets.

## SUPPLEMENT

### Rap da Peider

Glindesdi, gl' è prest las sis  
Stuair levar, co quai è fis  
Sut ils ponns e' l chaud restar  
Mo in zic, in zic siemiar  
D'in auter temp, d'in auter di  
Ma na betg dal glindesdi

Mintga di suar sc' in bov  
Per cletg gia in café las nov.  
Planisar la lavur dal di  
Durant il café da mezdi  
Fa il schef sco adina teater  
Spetg jau il café d' las quatter

Bischens da fier e bischens d'arom,  
Bischens da plastic e bischens da crom,  
Sifons e duschas, e tut las derscheras,  
Tualettas e hislis, trons e bogneras,  
Spinass dad aua e filters stuppads,  
Èn da nus dus vegnids schubregiads!

Tras bischens, chanals arrivain a la mar  
Dis en e dis ora en il chaud smarschunar  
Conchiglias e stgazis da plastic chattar,  
Pettas, chastels da sablun bajegiar,  
Mamma e bab cun sablun sutterrari,  
E semper mo dolci gelati mangiar ...

[Vacanzas far sper la mar  
dal sulegl laschar stgaudar:]

Bischens da fier e bischens d'arom,  
Bischens da plastic e bischens da crom,  
Sifons e duschas, e tut las derscheras,  
Tualettas e hislis, trons e bogneras,  
Spinass dad aua e filters stuppads,  
Èn da nus dus vegnids schubregiads.

*Peider raquinta en ses rap da la lavur quotidiana sco installatur e chanta cun ses ami  
Gion ensemen da lur siemi.  
Forsa has era Ti gust da scriver in rap sur da tia vita e tes siemis. Emprova!*